



Thamar déguisée, conçoit enfans de Iuda. Il la veut faire mourir, mais montrant enseignes de luy, elle fut absoute.

IUDA fils de Iacob auoit épousé la fille d'un Chananéen nommé Sue, de laquelle il eut trois fils: Her, Onan, & Sela. Il maria Her son aîné à Thamar, & iceluy estant mauvais, le Seigneur le fit mourir. Lors Iuda dit à Onan, Prends la femme de ton frere pour luy susciter lignée, mais luy fit le contraire: & pour sa méchanceté dépleut au Seigneur, qui le fit aussi mourir. Iuda dit lors à Thamar, Demeure veufue en la maison de ton pere, iusques à ce que Sela mon fils soit grand; mais il n'auoit point volonté de luy bailler. Aduint aussi que Sue femme de Iuda mourut, lequel apres le deuil estant reconforté, s'en alla voir tondre ses brebis. Ce que Thamar ayant sceu, laissant ses vestemens de deuil, se déguisa & voila sa face, & s'assit au chemin par où Iuda deuoit passer, pour l'attirer à auoir sa compagnie: Ce qu'elle eut, avec promesse qu'il luy enuoyeroit un gras Chevreau, dont pour gage elle tira de Iuda son anneau, ses brasselets, & son baston, puis se retira avec ces choses. Thamar apres estant trouuée grosse, Iuda la voulut faire brûler: Mais elle ayant montré les gages qu'elle auoit receus de Iuda, verifiant par iceux que c'estoit de son fait, elle fut absoute. Et lors Iuda dit: Elle est plus juste que moy, car je ne luy ay point donné Sela mon fils pour mary. Or elle enfanta deux fils, Phares, & Zara.